

14 MAC 2018

Tokan solo akhirnya tumpas



SHA HARUDDIN (tengah) menunjukkan ketulan ganja mampat yang dirampas.

Tokan solo akhirnya tumpas

Kuala Lumpur: Seorang lelaki berusia 49 tahun dipercayai dalang membekalkan dadah kepada penagih di Lembah Klang sejak 1990 akhirnya dicekup anggota Bahagian Siasatan Jenayah Narkotik (BSJN) Ibu Pejabat Polis Daerah (IPD) Dang Wangi ketika membuat penghantaran bahan terlarang itu pada Khamis lalu.

Tokan yang bergerak sendiri itu dikatakan mendapatkan bekalan dadah jenis ganja diseludup dari Thailand menerusi jalan tikus di sempadan Kelantan.

Ketua Polis Daerah Dang Wangi Asisten Komisioner Shahrudin Abdullah berkata, hasil tangkapan itu, pihaknya menemui lebih 39 kilogram (kg) ketulan ganja mampat disorok di rumahnya di Kampung Baru, dekat sini.

“**Dengan tertangkapnya lelaki ini, kita berjaya mematahkan satu rangkaian sindiket pengedaran dadah di ibu negara dan Lembah Klang**”

Shahrudin

Katanya, ketika ditahan jam 3.45 petang berhampiran rumahnya, suspek yang menunggang motosikal membawa 30 ketulan kecil ganja mampat di dalam bakul motosikal untuk diedarkan kepada penagih sekitar Lembah Klang.

“Susulan tangkapan itu, anggota BSJN IPD Dang Wangi membuat pemeriksaan di rumahnya dan menemui 38 ketulan besar ganja

mampat yang setiap satunya seberat satu kilogram.

“Hasil siasatan lanjut mendapati suspek pernah ditahan di Pusat Pemulihan Akhlak Penjara Simpang Renggam, Johor selama dua tahun pada 1999 mengikut Seksyen 3(1) Akta Dadah Berbahaya dan Langkah-Langkah Pencegahan Khas 1985,” katanya dalam sidang media IPD Dang Wangi, di sini, semalam.

Shahrudin berkata, semua ketulan ganja mampat dirampas bernilai RM70,600 dan untuk bekalan kepada 10,000 penagih sekitar Lembah Klang apabila diproses kepada ketulan kecil.

“Dengan tertangkapnya lelaki ini, kita berjaya mematahkan satu rangkaian sindiket pengedaran dadah di ibu negara dan Lembah Klang,” katanya.

